

COSMOGLOTTA

Oficial mensual organ del OCCIDENTAL-UNION

Redaction e Administration : INSTITUTE OCCIDENTAL, CHAPELLE (Vd) Svissia




COMITÉ
DE
RÉDACTION :

E. de WAHL
(Estonia)

Bertil BLOMÉ
(Svedia)

Dr H. NIDECKER
(Svissia)

Nr. 126
Serie A
MAY
1939



EVOLUTION DEL IDÈ DEL LINGUE INTERNATIONAL

Volapük 1881

Cifef klubama bevünetik nünom kopanales omsik, das al motófadel masela obsik ostitamon pükati ko litamags. Nütüf plo kompanals binom glatik.

Esperanto 1887

La estraro de la internacia Unigho sciigas ghiajn anojn, ke ye la naskightago de nia majstro ghi okazigos prelegon kun lumbildoj. La eniro por anoj estas senpaga.

Ido 1907

La direktantaro de la internaciona Uniono savigas da olua membri ke ye la naskodio di nia maestro ol aranjos diskurso kun lumprojekturi. La eniro por membri esas gratuita.

Occidental 1922

Li direction del international Union informa su membres que ye li die de nascentie de nor mastro it va arangear un discours con projectiv images. Li intrada por membres es gratuit.

CURT GRAMMATICA DE OCCIDENTAL

Un sol ARTICUL definit : li.

MASCULIN : -o. FEMININ : -a. PLURALE : -(e)s.

PRONOMINES PERSONAL: Yo, tu, il, illa, it; plurale: Noi, vu, ill.

ADJECTIVES : Adjectives invariabil. Finale inobligatori -l. Ex.: mieri.

INFINITIVES: Finale -r. Ex.: fini-r, ama-r, deve-r.

PRESENT del verbes: li radica sol. Ex. tu fini, tu ama, tu deve.

PASSATE: Finale -t. Ex.: tu fini-t, il ama-t, noi deve-t.

PASSATE COMPOSIT: per auxiliare ha-r. Ex.: tu ha finit, noi ha videt.

FUTURE: auxiliare va. Ex.: Tu va finir, il va amar, etc.

CONDITIONALE: auxiliare vell. Ex.: tu vell finir, yo vell prender.

IMPERATIVE: PLES, o li radica sol. Ex.: Ples finir! Fini!

PARTICIPIE PRESENT: -nt. PARTICIPIE PASSAT: -t. GERUNDIVE: -nte.

ADVERBIES: Finale -men. Ex.: visibil-men, regulari-men.

Occidental ne es un nov lingue, nam it es composit ex li international paroles ja conosset sur li tot terra. Pro to Occidental es li max facil lingue por li majorité del popules.

Occidental es difuset per li OCCIDENTAL-UNION (Sede: Chapelle, Vaud, Svissia), quel es neutral in religion e in politica, e per li national societés de propaganda. Li Occidental-Union es directet de un SENAT, e del CENTRAL OFICIE durant que li ACADEMIE decide pri li linguistic formes.

Li Institute Occidental in Chapelle (Vaud), SVISSIA, responde immediatmen e gratuitmen a omni demandes de information concernent Occidental, su scope, su grammatica e su vocabularium, e coresponde in francés, german, anglés, italian, hispan, Esperanto, Ido, Occidental.

Ples adherer al OCCIDENTAL-UNION !

ACTIV MEMBRE	Annual contribution : a) sviss Fr. 5.— con gratuit abonnement a Cosmoglotta ; b) sviss Fr. 8.50 con abonnement de propaganda (3 exemplares).
PROTECTORI MEMBRE .	Annual contribution : Adminim sviss Fr. 10.— (recive li abonnement de propaganda ; o 1 abonnement de propaganda por chascun sviss Fr. 10.—).
MECEN MEMBRE	Annual contribution : sviss Fr. 50. recive secun desir 1-5 abonnamentes de propaganda.
PERPETUI MEMBRE	Unic subvention de sviss Fr. 500. — recive secun desir 1-2 abonnamentes de propaganda.

Ples demandar li carte de adhesion del:

Occidental-Union, CHAPELLE (Vd), Svissia.

COSMOGLOTTA

CONTENE. — **Mitrovitch** : *Interlinguistic central organ.* — **Berger** : *Li eterni problema ; Li parol totalitari.* — **Federn** : *Li genese de Occidental.* — **Wahl** : *Li convergentie del sufixes.* — **Federn** : *Occidental e li telegraf.* — **Boutreux** : *Pri li decisiones ortografic del francés academie.* — **C.V.** : *li bell series comemorativ.* — **Berger** : *Un nov procede de dessin ; Occ. e li Ex-libris ; Ad. Ferrière.* — *Historiettes.* — *Cronica.* . .



Un del max famosi casteles de Suissia, ti de Lucens proxim Chapelle
Original dessin de prof. R. BERGER

Un interlinguistic central organ e un central biblioteca

Sr. Mitrovitch, professor in li comercial Academie de Sarajevo es ja conosset de nor letores per li litt brochura recenset de Cosm. « *Essai d'une grammaire interlinguiste* ». Il invia nos li secuent lettre por publication.

Mult interlinguistes probabilmen senti it quam deshonor que noi sempre ancor ne possede un intersystemal revúe quel vell accompaniar con sam amore li progresses de omni lingues auxiliari e junt vell

presentar coram li monde li interlinguism quam alquicos essentialmen unitari. Ne omni interlinguistes es tam rich que ili vell posser abonnar omni periodicos del auxiliari lingues, e si on desira un opinion o critica, on es fordat atinyer to per correspondentie privat, quo apare presc quam petition de almosne. Esque nor organisationes de lingue auxiliari ne vell posser con auxilie de IALA editer mem un minimalissim tal revúe ?

Si tamen ti proposition de interlinguistic solidaritá vell postular tro mult, esque it ne vell esser possibil con auxilie de IALA fundar in li Haag un interlinguistic biblioteca ? Hodie li plu povri interlinguistes deve pruntar interlinguistic literatura che li plu riches e sentir se quam mendicos. Chascun de nos vell plu bon sacrificar un summa de moné e quelc interlinguistic libres por li central biblioteca, quam esser reductet al pruntation de libres, ye quel on deve hontar.

Paul MITROVITCH.

A ti lettre Sr. E. de Wahl respondet per argumentes quel noi completmen aproba e, inter queles noi cita li secuentes :

Yo crede que vu torna vos al fals adresse. Revúes queles have un clar direction (tendentie), quam Espo, Ido. Occ, ne have interesse pri liga-de-nationes-atri babillada pri coses queles ili considera quam stant soluet. Un interlinguistic revúe have un sens solmen ta, u li problemas ancor ne es clarat, ma in devenientie (in tractation). Ma vu ha fallit li rect moment. Hodie it acte se, sam quam in li grand politica, pri perduction del propri stapunctu per omni medies. Li unic interesse pri tal discussiones e explorationes, vell esser IALA. Ja ante 10 annus, ye un conferentie arangeat de IALA, li present linguistes e interlinguistes ha fat li unanimic resolution que IALA mey fundar un revúe por realisar in it un scientic discussion del questiones concernet. Ti revúe nequande ha nascet. IALA ha payat quelc articules contribuet, ma nequande ha publicat les, e li cose ne havet resultate (= finit in sand) ...

Interlinguistic revúe ne posse exister sin considerabil subventiones, e hodie nequi have interesse pri lor existentie. Vu vell dever self fundar e financiar un tal !

Simil es li casu pri li biblioteca. Li pluparte del ovres e interlinguistic revúes desirat de vos es hodie ja bibliografic raritás. Null biblioteca presta tales, ne mem in li sam cité, tam minu a landes extran. E qui have moné crear un tal biblioteca ? Esperanto have du tal bibliotecas (1) Genève (Tour de l'Isle) e (2) Vienna (Hofburg), tal-nominat Esperanto muséos. Noi va poc a poc crear alquicos simil che nor organisation, e poy publicar lu max important in nor editiones. To va probabilmen esser li unic via por dar al plu povri nov interlinguistes li possibilitá conossentar se con li historie. A ti scope servit in su témpor li ovres de Couturat, Guérard, Stojan e Dreezen, etc. Un comensa por li direction naturalistic significa li collection « Spiritu de Occidental » comensat de I. Federn e obtenibil de Chapelle.

E. W.

Li eterni problema

Li recent evenimentes politic e transformationes de Europa semblat desastrosi por li afere del lingue international. Specialmen in li nationes totalitari li interlinguistica aparet proxim su morte. In Germania li crescent nationalism causat li interdiction de omni activitá in favore del intercomprension inter popules. On credet que li problema del lingue international esset soluet per su definitiv supression.

Ilusion, ti supression !

Li approximation de Germania a Italia, poy a Hispania, poy a Bohemia, it es a popules de altri lingues ha denov posit li problema del lingue international in li principal loc del preocupationes. E tis, queles escartat ti problema quam un non-sens, questiona se hodie : qualmen facilisar li relationes cultural inter li totalitari nationes ? On ne va adopter un sol lingue national pro que li altri nationes del Axe ne va inclinar se avan un tal preponderantie. On anc ne va adopter anglés !!! Do on va dever selecter un lingue neutral facil a parlar e a scrir.

Forsan Esperanto ? Ma exter su defectes e su artificialitá it have li in pardonabil vicie har esset creat de un Judeo e ancor de un polonés Judeo ! Just pro to it esset strax interdit in Germania. Ido, de su later esset elaborat de du Francéses, li unésim essent li ver e li altri li pseudo-autor. Resta solmen Occidental creat de un neutral person. E si in Germania on desira plu mult, on posse preciser que su original nómín es *Edgar von Wahl* ; Couturat in su *Historie del universal lingue* ante 35 annus nomina le solmen per *von Wahl* e ne per *de Wahl*.

Do, sive per li personalitá del autor, sive per su neutralitá, Occidental oferta li maximal chances esser agreeat del nationes del axe. To ha bon comprendet ja unésim nucleo de Italianes. Li italian revue *Fronte Unico* aparient in Roma fa un intens propaganda por difuser Occidental. In su numero del 30 marte it scri inter altris, in Occidental :

Ho-annu esset fundat un Internationale Kameradschaft Turistik, constituet de l'autoritari states Germania, Italia e Nippon. On espera l'adhesion bentost de Hungaria, Yugoslavia, Hispania e Bulgaria. Ma omni to vell desfacilisar li solution del problema de immediat comprension. Per li cultural axe Berlin-Roma es recomendat e favorisat li studie del reciproc lingues national. Ma per li augmentation del amical states con queles on sta in alqual relation ti proposition soluer li lingual problema per studiar li respectiv reciproc lingues, es mem impossibil. Ci demonstrar argumentes por prubar it, es absolut innecessi. Vi li sol rect e practic solution per accepter un sol lingue constructet quam unitari medie por posser far comprender-se immediatmen in omni campos del vive modern ; do in politica, diplomatie, scientie, medicina, comerce, congresses, sport, turistica, technica, etc. E con poc profetic vision on posse constatar, que ti lingue a selecter e accepter va dever devenir li interlingue de Europa. Pro to su caractere deve esser european e neutral e pro to constructet ex origine del west-european lingues e talmen reflecter li Latin, base del occidental cultura.

Un tal lingue ha esset decovrit e combinat con li leyes del linguistica per professor Edgar von Wahl, quel dat a su ovre de 30-annual labor de studie e exploration li nómine « Occidental ». Ti lingue-systema « Occidental », elegant e modern, monstrat per li present articul, vell esser un digni idiomatic medie, apt por immediat intercommunication e comprension in scopes del ho-temporan e futur era. Mey Occidental devenir un ponte lingual inter li popules: un commun e unitari lingue auxiliari mundal.

Li parol « totalitari »

Ti nov vocabul ha devenit tam familiari que li lingue international devet anc adopter it. In li lingues national ti vocabul es strax comprensibil, nom *totalitá* es ja international (In francés on di *totalité*, in hispan *totalidad*, in italian *totalità*, etc.) Ma durant que Occidental forma regularimen *tot*, *tot-al*, *tot-al-itá*, *tot-al-it-ari*, li du altri lingues international genite strangi derivates: Esperanto di por li nómin *tut-eco* e por li adjective *tut-eca*; Ido di *tot-eso* e... *tot-es-ala*! Ma ne audaciant usar ti « logikala » invention del derivation Couturat, li Idistes just creat li nov radica *totalitera* (Centerblad, nov 1938).

A quo servi li cuidosi selection del max bon radica secun li famosi « principie del maximum de internationalitá » si per afixes mal selectet on forma innatural e incomprensibil derivates, quam *totesala* quel on ne audacia usar? It es exter dúbita que li unesim labor a interpretar es refar completmen li derivation in Ido.

In plu ti parol *totalitera* es drollimen copiat sur li francés *totalitaire* quande in realitá li ver sufixes **ar(i)** e ne **er(a)**, quo monstra bon in francés altri exemples del sam derivation: *militaire*, *milit-ar-isme*, *scolaire*, *scol-ar-ité*, etc.

Li creator de ti parol *totalitera* in Ido ha monstrat vermen un astonant ignorantie del elementari (e ne « elementera! ») notiones linguistic. E quande on constata que it es Sr. Quarfood self, anteyan president del Ido-Academie, on resta stupefat!

R. B.

Scientie e superstition. — Un anglés scientist raconta li secuent anecdote: Yo esset in India ante quelc annus, in li moment de un eclipse de sole, e yo hat eat in li observatoria de Bombay por plu bon vider li fenomen. Yo incontrat ta un hindu astronom, educat secun li scientific europian metodes, quel dat me con li max perfect complesentie omni aclarationes queles yo desirat. Ma in li moment exactmen anunciat de il por li comensa del eclipse, yo videt le con grandissim surprise precipitar se vers un tambur e frappar sur it per li tot fortie de su brasses. Il explicat que to esset fat secun li custom de su antecessores, por chassar « li mal demon quel menaciat vorar li sole ».

E pro que yo fat remarcar le quant inlogic esset su conduida, il respondet me tranquilmen que li scientie e li fide havet chascun lor propri dominia e devet esser tractat chascun secun lor leyes.

LI GENESE DE OCCIDENTAL

Ante publicar *Occidental*, senior de Wahl ha fat 30 annus de interlinguistic labore. Omni Occidentalist save to, e noi lee it in presc omni folies volant. Ti númer es un simplification conventional. Si noi conta desde su studie de Volapük 1887 til li publication de *Occidental*, noi ariva a circa 35 annus de interlinguistic activitá, si noi comensa desde su abandon de Esperanto 1895, resulta un epoca de circa 27 annus de independent interlinguistic reserches. Inter ti du egalmen justificabil númeres, 30 es un arondation medial acceptibil por propagandistic scopes. Con respectosi astonament noi constata que hodie, 1939, Edgar de Wahl, li max ancian interlinguist vivent, conta 52, **plu quam un demi secul, de interlinguistic labore**. Null, absolutmen null lingue-structor, ni mort, ni vivent, posse comparar se a to.

Li synoptic tabelle de R. Berger pri li revúes de interlinguistic discussion (Cp. *Cosmoglotta A*, nró 124, januare 1939, pág. 5) monstra in quant divers ocasiones senior de Wahl ha laborat e colaborat. Ma su articules es disperset in mult revúes, mort e exhaustet desde long e practicmen inobtenibil. Li interlinguistic amatores e studiosos de date recent trova ye lor disposition un rich literatura de tractates in sens esperantistic, ma sovente es surprisat audir que it existe anc un classic interlinguistic literatura tractant li sciencie del lingue international sin li ballast de un arbitrari skema preconceptet: li ovre de senior de Wahl es tro poc conosset, e on solmen posse cordialmen regretar to.

Noi deve far quo noi posse por repara ti manca. Li articules de Wahl ex li ancian numerós de *Kosmoglott* es nu reeditet in un collection nominat « Spiritu de *Occidental* » (li subscriptores de ti ovre ha — quande ili vide ti lineas in print — just ricevet li 4. liveration). Ma mult labores de Wahl ne mem ha aparit in print; ili sta in lettres adressat a interlinguistic amicos.

Felicimen senior de Wahl havet li custom prender copies de omni interlinguistic lettres in grand libres, e il havet recentmen li amabilitá dar li max interessant de ti libres a nor disposition. It contene lettres e articules ex li epoca del Delegation, 1907-1909, interlinguistic labores e comentationes pri li epoca, li preparation del sessiones, e lor consecuenties. Con poc exceptiones li textus es redactet in German, Esperanto e Auli (Proto-Occidental). Noi esset autorisat ne solmen leer ti labores de interesse enorm e inchangeat actualitá, ma anc copiar li partes essential e publicar extrates.

Li redaction de *Cosmoglotta* es felici posser anunciar que desde nu it va secun necessitá e occasion posser publicar extrates de valore permanent ex li corespondentie de Edgar de Wahl, in reviset traduction a modern *Occidental*. E noi permisse nos invitar a lor studie tut specialmen li colaboradores de **IALA**, queles ha proposit se quam tache quasi repetir li labores e del delegation e de senior de Wahl. Noi ne dúbita que ci ili va trovar un studie-materiale de considerabil utilitá e quel va economisar les un parte de duplic labore.

Considerante que li interlinguistes a queles li textus responde es hodie mort, e li circumstanties del lettres sovente es sin special interesse, noi ha supresset u ili ne esset indispensabil li mention del destinatarios de lettres, li adresses, alusiones a personas etc. Noi ha tamen conservat li (aproximativ) dates del redaction del textus concernet. Detalties queles ha perdit li interesse, hesitationes interim stabilisat, es supresset, talmen que li textus in general es plu curt e plu arondat quam li originale. Li anotaciones signat per « EW » apartene al originale, tis signat per « I. F. » es recent adjuntiones explicativ.

Ilmari FEDERN.

Li convergentie de sufixes

(Ex li copie-libre de Edgar de Wahl, scrit in juli 1908)

Li punctu cardinal in li labores de creation de un Lingue International es li importantie del selection del ver sufixes.

On (sr Miler) ha criticat li sufix « **-eso** » de Ido a quel il vole substituer « **-ito** ». Yo consenti a ti substitution, ma yo ne posse consentir a ti form, quel vell haver li tonic accentu sur li i : « **absurdíte**, **santíte** » etc.. To apare me tre infelici, nam li accentu ne jace in null lingue sur li i ; in anglés it jace sur li vocale radical e in omni altri lingues sur li silab secuent al i. Li sufix total es « **itat** » e es conservat in quelc casus, p. ex. *quant-itat-iv*, *qual-itat-iv*. Li i ne es essential : p. ex. *majestat*, *pietá*, *libertá*. Exceptet li casus rar supra-citat, li silab **at** de ti sufix desapari in compositiones e derivates, p. ex. *majest-osi*, *piet-ist*, *purit-an*, *libert-in*. Pro to it apare ne-util *) conservar li ultim silab « **at** », tam plu quam ti finale es egal a ti del participies passiv del verbes in ar, de queles forma se un multità de derivates in **-ion**, **-or**, **-ura**, etc.

Ma ultra to, li form **ito** have li grand desavantagie, que it coincide con 4 divers formes ja existent :

- (1) Li participie passiv del verbes in **-ir** (« *finit*, *audit* ») ;
- (2) Personas, posteriores o adherentes de alcun person o habitant de un loc, p. ex. *israelit*, *eremit*, *adamit*, *sodomit*, *semit*, *jesuit*, *carmelit*, *moscovit*, *levit*, etc.
- (3) Minerales, p. ex. *granit*, *malakhit*, *melinit*, *dynamit*, etc.
- (4) Maladies, p. ex. *meningite*, *pleurite*, *difterite*, etc.

Tal coincidenties e colisiones अपari sovente in li lingues modern, nam li ultim silab inaccentuat quel ili havet in Latin ha desaparit : (1) *perditus*, (2) *eremita*, (3) *granitum*, (4) *pluritis*. Un tal convergentie de sufixes presenta un grand desfacilitá por un Lingue International quel deve haver exactmen definit afixes, e to vale specialmen por Esperanto in quel omni substantive fini per **-o**. Yo vell propositir : (1) *perdit*, (2) *eremito* (con **-o** = personas masculin), (3)

*) Ci on posse vider que it ne es lu sam, dir *ne utit* e *inutil* e que li traduction de Esperanto « *senutila* » por li duesim es tutmen bon. Ti construction trova se anc in anglés : « *-less* », russ : « *bes-* », e german : « *un-* » e « *-los* ».

E. W.

granite (con -o, neutral sin specification), (4) *pleuriti* **), (5) *purité* o *purità* (con accentuat final vocale ***).

Un altri tal casu es presentat del sufix -in :

(1) adjectives indicant materie, provenientie, origine : p. ex *marin*, *alpin*, *infantin*, *feminin*, *ferrin*, *serpentin*, (*florentin*), etc.

(2) Persones : *cusino*, *cretino*, *capucino*, *mandarino*, *H. padrino*, *F. coquin*, *I. vctturino*, etc.

(3) Persones feminin : *L. regina*, *concubina*, *I. ballerina*, *gallina*, *heroína*.

(4) Scienties : *medicine*, *doctrine*, *discipline*.

(5) Coses ne vivent : *lavine*, *carabine*, *bulletin*, *bassin*, *tamburin*, *jardin*, *camin*, *florin*, *cussin*, *farine*, *retine*.

(6) Chimicales : *casein*, *codein*, *aspyrin*, *phenacetin*, *margarin*, *tannin*, *cafein*.

(7) Abstractes : *F. famine*, *haine*, *routine*.

(8) Diminutives : *I. signorino*, *bellino*, *F. diablotin*.

Li sens principal apare esser « provenientie, origine », e in tal sens anc li signification de lu feminin e del diminutive deveni comprensib¹, samli li chimicales. Li altri casus posse presc omni esser regardat quam paroles radical, nam li sufix ta ha ja perdit su signification. In omni casu li sense de feminitá es tre rarmen usat, solmen in li poc exemplares queles yo ha citat. Si on desira un sufix special, -essa es plu international : *princessa*, *abatessa*, *comtessa*, *baronessa*, *ducessa*, *actressa*, *imperatressa*, *directressa*, *inspectressa*, etc. specialmen por paroles significant un titul o oficie, o charje.

Vice li sufix « ge- » de Esperanto-Ido on vell posser in quelc casus usar li preposition con : p. ex. *conpatres*, *confratres*, *conseniores*, quam es fat sovente in hispan e italian.

Li sufix local es ia (ium), quel es adjuntet a radicas significant un person. p. ex.

**) In Occidental (quel aparit solmen 14 annus pos scrition de ti articul) on usat durant li comensa quam sufix de maladies egalmen -itis e ite. Hodie, li duesim form es generalmen preferet, corespondente plu bon al caracter de Occidental. Li coincidentie con li sufix del minerales ne ha monstrat se trublant ; li grand pluparte de ambi categories es presc exclusivmen scientific paroles. I. F.

***) A tis queles time que ne omni printeria have vocales accentuat, yo consilia usar un apostrof : *purita'*. — On vide quel variabilita' e flexibilita' on posse atinyer si on ne depende de un vocale constant quel da solmen li possibilita' variar li radica, p. ex. : *port*, *pord*, *puort* (Occ. = *porte*, *porta*, *porto*) ; un metode barbaric e impratic, quel Esperanto tamen abusa enormmen. E. W.

-ité, -ita. Occidental hodie distinye ti du finales. Li unesim designa un colectivité, generalmen de homes, li duesim, mult plu frequent, li qualita. Cp. *homanité* : *nationalité*. In Esperanto li correspondent paroles vell esser : *homaro* : *homeco* (*humaneco*), *kristanaro* ; *kristaneco* ; *nacianaro* : *nacieco*. I. F.

- (1) *Francia, Svissia, Russia, Hispania, abatia, senioria.*
-ero (2) *juveler-ia, barber-ia, liber-ia.*
-or (3) *directoria, dormitoria, laboratoria, observatoria.*

In li lingue russ omni ti formes have un form comun **-ia** ; noi posse secuer to in li Lingue International.

Li finale **a** ne have inconvenienties, nam nequí vell prender it in ti ci casus por li finale feminin. On posse distinyer inter *juveleria* e *juveleri*, li unesim significant li loc e li duesim li afere e su product. Li finale **-le** resta alor por li abstractes, quam in Novilatin de Beermann : *diabolerie, bigotterie, pedanterie, galanterie, jalousie, companie, maladie.*

Ex li citat exemples on posse vider que li perde del finales latin *us, a, um, ius, eus, ea, ia, ium* ha causat un convergentie de mult sufixes con divers senses, e que on posse haver un sat bon parolformation, si on ne es ligat per li « Esperantism de constant finales », specialmen por li substantive, quel deve restar líber e es suficientmen definit per li articul, tam plu quam li paroles principal, queles trova se in li lexicos, ne besona un etikett special.

*Autorisat adaptation ex « Auli »
 (Proto-Occidental), de Ilmari Fédern.*

OCCIDENTAL E TELEGRAF

In li character del telegramma es supresser omni parol considerabil quam superflú. In romanic lingues con rich collection de finales personal to ne es un problema. In contrari it ha ductet li germanic lingues, povri ye differentiant finales, a special conventiones telegrafic : Si on consenti, que personal pronomines deve esser supresset si possibil in telegrammas, sovente li verb restant vale por pluri persones possibil. « *kaufen* » german es « *comprar*, noi compra, ili compra, ples comprar ». Por li imperative li german do retorna al antiquat form del 2. person pluralic, « *kaufet* » (ples comprar), quo on nequande vell scriir in lettres. Lu sam vale por anglés : « *come* » vell posser esser : « *yo veni, noi veni, ples venir* ». On do conventionat usar it solmen por li imperative e usar li participie present quando li person parlant es implicat. « *Come sunday* » vole do dir « *Ples venir soledi* », durant que « *Yo (noi) veni soledi* » es expresset per « *Coming sunday* ».

In Occidental un simil problema posi se pro que li radica verbal significa in sam témpor li verb finit « *yo veni* » e li imperative « *veni !* » Usar li form con ples vell in max mult casus esser considerat quam ballast e contra li styl telegrafic. In telegrammas inter Occidentalistes til nu ha monstrat se quam tre pratic li secuent convention : Li verb finit implica li person parlant, durant que vice imperative es usat li infinitive sin « *ples* » « *(yo) veni soledi* » — « *(ples) venir soledi* ». Confusiones in practica ne evenit, nam li morse-signe por **r** : punctu - strec - punctu, es suficientmen complicat por ne esser obliviat.

I. F.

Pri li decisiones ortografic del francés academie

In Cosmoglotta nró 122 esset publicat quelc decisiones del francés Academie. In Cgl nró 123, Sr de Wahl critica ti decisiones, queles oficialisa li un ex du grafies de mult paroles, e abandona li altri.

Sr de W. expresse su astonament avan « un tamen insystematic e inscientic labor : ci on secue li latin etymologic ortografie, ta on secue un simplificat tal, sin que un rasonabil fil o idé vell posser duc ter nos ».

It es necessari saver quo es li francés Academie e ca it es qualificat por tal decisiones. Ti « companie ne es un société de linguistes, grammaticos, scientistes, ma de literatores : roman-autores, poetes, dramaturges, — e dignitarios : un representant del armé, un del ecclesie, un del eloquentie, anc si ti dignitarios ha poc scrit.

Ti Academie, fundat de Richelieu, li celebri cardinale e prim ministre, in 1635, devet redacter un dictionarium e un grammatica, inter altri coses.

Li dictionarium existe ; desde 1635, li academianos fa e refa it. Ma li academianos, mundan mannes, ne have tempore, e quelcvez manca a ili li competentie por ti labor. Pro to, ti dictionarium ne es oficial, e ni un student, ni un professor, ni un scientist fide a it. On have in scoles e bibliotecas bon dictionariums, scienticmen redactet : *Littré, Hatzfeld, Darmsteter e Thomas*. Por li grammatica on atendet desde 1635 til... 1932 ! Hodie on possede it. It ha conosset un grand success de curiosité ma on save que it es li ovre de un sol academiano, Sr. Abel Hermant, roman-autor, bon grammatico, quel hat publicat mult grammatical articules sub li pseudonym de Lancelot (nómine de un celebri grammatico del XVII esim secul). Li « academic » grammatica ne es perfect. It secue e defende li traditional classic linea, ma ne tolera null product del evolution, e es tre incomplet.

Concernent li ortografie, li autorité del Academie ne es plu grand. In null scolari examine, li examinatores ne egarda li academic decisiones, ma solmen li usual ortografie.

Li list dat in Cosm. 122 es oficialisat con li sol ortografie conosset desde ottant o cent annus, li sol quel on trova in li usual dictionariums ! Do, li Academie sanctionat un statu existent ; su decisiones esset motivat solmen per li usa e li omnipotent custom, exceptet por un sol parol : *gajure* (Red. : ci Sr. Boutreux expresse su astonament pri li adoption de ti parol. Noi deve confesser que it existe ta un erra de interpretation debit a un revue francés. In realité, li parol resta *gageure* quam usual).

Recentmen esset fundat in Paris li *Office de la Langue française*, quel es un société de grammaticos, linguistes e professores e quel, conform al ver scientific linguistica, da solmen consilies por guidar li evolution del lingue. Su avises es tre apreciat.

L. Boutreux, director de scole, Saumur.

FILATELIE LI BELL SERIES COMEMORATIV

In fine de nor articul precedent noi ha dit que mult series comemorativ merite attention — exceptet tis emisset pro motives strictmen speculativ. Noi nu va brevimen descrir o solmen signalar li max bell series, e tis queles concerne un eveniment de importantie real. Inter li postmarcas emisset recentmen, li max frappant es certmen ti quel celebra li amicità franco-anglés, emisset in ocasion del viage del anglés soveranes in Francia ; du manus presse unaltru super li Canal symbolisat per un spacie obscur inter li turre de Westminster e li Arc de Triumf. Li marca es blu-pallid, plu larg quam alt, con valore de 1. 75 ffr. Li Republica Argentin quel ha emisset mult series comemorativ, omnes tre bon fat, comemora per du marcas, de 10 e 15 cts. li viage del president de Brasilia a Buenos-Aires. Li sam tema : du manus unit strettmen sub li flags desplicat del du landes latin. In 1920 Brasilia ha comemorat li visite del rey Albert I. del Belgia a Rio, per un 100 reis portant in du medalliones li bustes del rey-soldat in levul e del president Pessôa in dextri. Un altri marca de 200 reis, poy un serie contenent li 300, 700 e 1000 reis consolida e celebra li amicità de Brasil e Uruguay.

Uruguay ha emisset six marcas tre bell in honore del visite del president Vargas a Montevideo. Japan a signalat al munde li visite de su prince hereditari imperial in Europa per un tre jolli serie comemorativ monstrant li naves curassat modern Nagato e Kugo e li cruza-tores rapid Hirato e Minekase. India anglés ha comemorat li viage de George V. a Delhi per marcas splendid, con un tema central grandiosi, in cadres feal de temples, pagodes, palazzos e magnific portales. In un medallion on vide li cap del rey, sub un coron imperial. In Europa li series comemorativ es innumerabil.

Francia ha celebrat li viage del Legion American per du marcas de 90 e 1.50 ffr., representat Lafayette e Washington e un paketbote modern ; li quinesim centenarie del liberation de Orléans per Jeanne d'Arc es comemorat per un 50 c blu, litt formate, sat comun. Un tre bell figurine es ti del centenarie del conquestation de Algeria ; tis queles rememora mannes celebri es numerosi ; vi ili per órdin cronologic : 1923 Pasteur ; 1927 Berthelot ; 1933 Briand, Doumer e Hugo ; 1934 : Jacquard e Callet ; 1936 Ampère, Pilâtre de Rosier, Rouget de L'Isle, Jaurès, Berlioz ; 1937 Corneille, Mermoz, Descartes, A. France, Rodin e Loti ; 1938 Charcot e Gambetta. Ti serie va continuar ; omni figurines es splendidmen fat. Inter li series max recent lass nos signalar : in Germania, ti destinat a comemorar li inauguration del teatre de Saarbrücken ; in Belgia li anunciation del Exposition in Liège ; in Bulgaria, li propaganda in favore del productes national ; in Italia, li proclamation del Imperia ; in Latvia, li duantesim anniversarie del Republica ; in Monaco, li quarantesim anniversarie del decovriton del radium, in Polonia, li anniversarie del Independantie ; in Portugal li congress international del viniera e del vin ; in Russia, li glorie del sovietic aviation ; in Turcia, li introduction del alfabet latin. Lass nos ne obliviar que actualmen plu quam 400 series comemorativ es emisset per annu ; noi devet restricter nos a presentar li max characteristic tales.

C. V.

Un nov procede de dessin

Desde quelc annus expande se sempre plu un nov procede de representation del volumines, quel va certmen interessar nor letores : It acte se pri li *perspective axonometric*. In ti perspective fuyient lineas resta paralel vice converger quam in li ordinari *central perspective*. Ti




Fig. 1




Fig. 2

procede es naturalmen un convention ma un convention tam simplic e facil que it generalisa se rapidmen in omni dominia.

Li present clichées, queles ha esset prestat nos del prahan revue *Kreslir*, monstra li principie del procede. On suposi que li corpores es videt obliquimen de supra o infra. Quam on vide in li fig. 1, por representar un chambre, on comensa per traciari li fuyient lineas ascendent a levul e a dextri, poy li verticales. On obtene talmen un systema de tri paralelismes in quel omni volumines es dessinat con un surprisant facilitá. Finalmen on ombra li corpores por obtener li relief, per colores o per crayonagie (fig. 2).

Ma li dessinatores ha inventet alquo ancor plu simplic ; it es li *elevation sur plan*, in quel li tri habitual figuras (plan, facie, profil) es combinat in un sol.

On dessina in prim li plan, quam es fat in li superior image del figuras 3, 4, 5, poy on posi li plan *obliquimen* (inferior image) e de chascun angul on eleva li verticales con proportionat altore. Adjuntente li ombres on obtene un exact relief in *obliqui vision*.

Fig. 3







Fig. 4







Fig. 5




Ti procede es util precipue in arkitektura u li relief es superposit directmen sur li plan del construction. Li direction del regard es plu vertical quam in li ordinari axonometric perspective de images 1 e 2. Tamen on acostoma se rapidmen a ti aspect. In 1937 li planes del universal Exposition de Paris esset dessinat talmen per ti procede in li grand revue *l'Illustration*, sin que li general publica esset chocat. It es do probabil que in future li dessinatores va sempre plu utilisar ti nov medie de representation.

R. Bg.

Occidental e li ex-libris

EX LIBRIS



AXEL LUNDGREN

Noi ja parlat pri ti interessant arte in *Cosm.* Nro 107 (Marte 1936). Hodie noi have li plesura monstrar li personal *ex-Libris* de un de nor coidealistes, Sr Lundgren de Svedia. In ti gravura Sr Lundgren ha resummat su intellectual occupationes. On posse vider in it anc li insignie de Occ. Ti *ex-libris* es probabilmen li unesim in quel apari li emblema de nor movement. Noi regreta solmen que li tilde ne es sat curvat. Altri amatores mey atenter li exact dessin de nor emblema.

Li cifre null in matematica. — Li invention del cifre null esset genial, pro que it possibilisat li developation del logaritmes e alt matematica. Li introduction del nov numeration in Franca es atribuet al monaco Gerbert, contemporan de Hugues Capet, arkiepiscop de Reims. Ti quel inventet it, ne previdet li consequentie de ti signe in filosofie, in historie, in scienties natural, chimie, astronomie, calculation, etc. Sin ti null, quel sembla esser necos, li homanité ne vell har atinyet li present stadie de civilisation. On ne conosse su inventor, un obscur Hindu. Su trova esset nos aportat per li Arabes.

Dr Adolphe FERRIÈRE



Adolphe Ferrière, de Genève, li celebri promotor del « activ scol », ha consacrat su tot vive al reform del education vers un plu grand comprehension del anim infantin. Su ovre es imens : Ad. Ferriere ha publicat plu quam triant libres e brochuras e circa mill articules pri questiones sociologic et educativ. Li plupart de su libres ha esset traductet in altri lingues, precipue in hispan.

Ad. Ferrière es un educator de rasse. Ja su preavo esset preceptor che li famosi francés scritora Sra de Stael. Con Rousseau, De-

croly e Montessori, Ferriere es noie li max influent autor educational.

Presentante su portret, noi aporta le li tribut de nor admiration e nor cordial desires ye li ocasion de su 60-ésim anniversarie.

DANGEROSSI JURNALISTES

Leoncavallo trovat se un die in Manchester e decidet assister « incognito » li representation de un de su ovres : « Pagliacci ».

Apu il, un spectator aplaudet con frenesie. Leoncavallo, por vider ca ti entusiasm esset sincer, comensat desapreciar li ovre.

« Mastre-ovre ? » il dit, « yo ne have li sam opinion. E pro que yo es anc musicant, yo pretende posser judicar just. Ti opera ne vale necos ! Escuta ! Li cavatina es imitat secun Berlioz, li duo del duesim act es copiat de Gounod. E li finale es un pallid eco de Verdi ».

E ye li secuent die li max important jurnal de Manchester publicat un sensational articul de quel li titul, in litteres enorm, esset :

« Li opinion del maestro Leoncavallo pri su « Pagliacci ». Il confesse har plagiat. Complet confession de un compositor indigent qualcunc original inspiration ! »

Li entusiasmat spectator esset journalist e il hat reconosset Leoncavallo !

Li resurrectionistes. — Antey, in Anglia, li pratica del anatomic scientie incontrat exceptional desfacilàs : it esset interdit aperter li còrpor del mortos por far li experimentes queles postula li scientie. De to consecuet, que on apertet secretmen li tombes, que on transportat li cadavres sur li table de dissection del chirurgo.

Tis queles fat ti labor esset nominat resurrectionistes ; ili esset dividet in du classes : li amatores e li furnitores.

Consequenties del modernisation del ecclesias. — In august 1937, un ex-preceptora de un scol del canton Fribourg in Svissia fat su devotiones del vèspèr in li nov e jolli ecclesia de Grandvillars. Secun li exemple del publicano del Bible, illa hat plazzat se in li angul max obscur del edificie.

Quande li custode del ecclesia venit cluder li ecclesia, il ne videt li senioretta in su angul, quel audit necos, e talmen inprisonat la in li sanctuarium. Su prega finit, illa constatat li clusion, ma sin emoer se pro to, e decidet passar li nocte in pregas. Circum clocca ll, trovante que li témpor passat tro lentmen, li senioretta volet accender li luce del cloch-turre por attraer li attention del vicines e far aperter li ecclesia. Illa torna un interruptor — quel accende necos, ma fa moer li electric sonerie, e omni cloches comensa joyosimen sonar. Grand emotion in li vilage, li popul adcorre por questionar. On aperte li portas e omnicos explica se. On mult ridet, exceptet ti brav paisan quel in su hast posit su pip accendet sur su lette e revenit ad hem just por extinyer li foy quel hat developat se in su matrass.

Save vu...? ... que li fornes fusiv del tot munde producte omni annu suficient ferre por circumdar li terra per un gross cable spess de 50 cm.

... que si li aure contenet in li mare vell esser dividet inter omni habitantes del terra, chascun vell receiver un bloc valent 120 milliones de francs francés.

... que li max levi alliagie de aluminium quel on conosse es li duralumine. Mersí a su levità it es usat hodie in important quantités por li construction de aviones, hydraviones, automobiles, bicycles, etc.

... que in tri inflammettes de antey esset contenet fósfor suficient por mortar un hom, e que in un hom es contenet fósfor suficient por far 800 000 inflammettes.

... que li bank-bilet esset creat per hasard. In 1664, ne havent suficient moné por pagar li francés truppees in Canada, li administrator havet li idé signar « bons » sur lud-cartes. Louis XIV plu tard aprobat to e garantiat lor payament.

Rectification

In li pagine 7 de Cgl 1939 ha glissat se un regretabil print-erra quel disrumpet li sense del articul de E. de Wahl. Li 14-ésim linea comensant per *fonética* deve venir pos li 11-ésim comensant per *lingues*. Chascun letor es petit rectificar.

CRONICA

FRANCIA. — Li important revue *L'Ecole libératrice*, (tirage 100.000 exemplaires), ha publicat li 15-IV-1939 un litt articul in e por Occidental con li adresse de nor coidealist L. Boutreux, director de Scol in Saurmur.

ITALIA. — Convictiv et habilmen redactet articules, ne solmen por Occidental ma anc in Occidental, aparit in *Fronte unico e Italia filatelica*. Grand richesse de idées e styl tre pur. It es apen credibil que li dictionarium italian-occidental ne ja aparit! Notabil es precipue li articules scrit in Occidental per Sr Taddeo Giaccardi. Su critica de Mondilingwo in li nro de Marte de *Italia filatelica e Cosmoglotta* es vermen bon. It concorda completmen con nor propri opinion.

SVISSIA. — Li *Revue internationale de Sténographie* publicat in Bienne, de Sr Bieller, continua propagar nor lingue infatigabilmen. Li nro de Marte publica un lecion de Occidental e quar pagines extraet de Cosmoglotta. Noi recomenda ti revue a omni nor letores interessant se a stenografie. Adresse: 11, *Chemin Ritter, Bienne, Svissia*. Abonnement annual: fr. 4.

Li Comité del *Swiss Association por Occidental* reunet se in Lausanne le 23 april sub li presidentie de Sr Mayor, chef de buro in la companie de asecurantie « La Suisse ». Li discussiones, tot in Occ., concernet li proxim reunion international in Zurich, li fundation de un cooperative de editiones. On discusset anc propositiones de Major Tanner (Bern), pri li propaganda e un raport de Sr Matejka (La Chaux de Fonds) pri nor relationes con IALA.

ON LABORA. — Li recent politic evenimentes obliga li Occidental Union nominar un *nov president*. Es proposit Sr Alphonse Matejka, quel ja es li representant de Occidental che IALA. On sàve que Sr Matejka es un habil sviss polyglott conossent perfectmen li postulates, li historie e li conditiones del interlinguistica. Durant pluri annus il esset li general secretario del Idistes et li chef-redactor de lor revue *Progreso*. It va esser un grand facilitation por nor movement que li Central Oficie, li presidentie del Union et li redaction de Cosmoglotta trova se in li sam region, li francés Svissia, e in un land u li opinion es e activitas intelectual es completmen liber.

Li secretario del Academie de Occidental labora nu in li redaction de 3 *lexicos*: Un lexico alfabetico contenen omni paroles oficial, por vicear et completar li Radicarium directiv quel es presc exhaustet. — Un lexico classant li paroles secun li finales (Rim-lexico) por decider pri problemas de finales. — Un lexico classant omni paroles secun families (Ex.: star, stabil, constatar, state, statuar, constant, etc.) Ti enorm labor va esser fat sat rapidmen mersi al iniciative de Dr H. Nidecker, de Basel, quel vertet li tot lexico german-occ. de Gaer in un *cartoteca* alfabetico secun li Occ. paroles.

Li coidealistes queles accepte far copies o classification per scri-machine por accelerar ti labor lexicologic es petit scrir al Occidental-Institute de Chapelle.

Li *fundamental grammatica* de Occidental quel es absolut necessari por redacter manuales in lingues national (por exemples in Nederland u it es indispensabil por continuar li propaganda) ha just esset perfinet de Ric Berger.

In Anglia Sr C. Reeve publica un brochura por docer Occidental secun un nov metod sub li titul: « An experiment in teaching one-self Occidental ».

OCCIDENTAL-LITERATURA

* Editiones mimeografat.	Afrancat
IN ANGLES: * RAXWORTHY A. W. S.: Introductory Occidental Grammar	SFr. 0.60
* Dr KEMP: Dictionarium Angles-Occidental (in preparation).	
* FEDERN-KEMP-HAISLUND: Occidental-English vocabulary	0.60
IN DAN: FEDERN-HAISLUND: Occidental-Dansk Ordbog	0.50
IN FINN: T. TATTARI: Occidental Kansainvälinen Kieli	1.50
IN FRANCES: L.-M. de GUESNET: L'Occidental (principes de la langue)	0.30
* Qu'est-ce que l'Occidental?	0.30
* Aux Espérantistes	0.30
BERGER: L'Occidental en 5 leçons	0.40
* Dictionnaire Français-Occidental, 316 p., en cahiers	5.—
* Solidement relié	9.80
* Vocabularium Occidental-Français (2-ésim edition reviset)	0.50
* Historiettes in Occidental (avec traduction française)	0.60
CHANAUD: Index Français-Occidental au Radicarium	0.80
IN GERMAN: Divers Autores: « Occidental, die Weltsprache », 256 S. Leinen 4.50, Geh.	3.—
Divers Autores: « Die Weltsprachenfrage in moderner Auffassung »	Ex. *Occidental * 1.20
Mag. phil. A.-Z. RAMSTEDT: Occidental Kursus in 10 Lektionen	die 1.20
GRABER ERNST: Wörterbuch Occ.-Deutsch und Deutsch-Occ.	die Weltsprache * 1.—
* BLASCHKE: Der Kampf um die Weltsprache	0.50
JANOTTA: Leitfaden der Weltsprache Occidental	1.—
OCCIDENTAL, Begründung, Grammatik, Wortbildung	0.50
GAR: Wörterbuch Deutsch-Occidental, Gebunden 5.30, Broch	2.50
* Dr SCHRAG, Dr ASCHWANDEN, Dr NIDECKER: Die moderne Weltsprache	0.50
* Historiettes in Occidental (con trad. german)	0.60
FEDERN: Occidental-Grundlage für einen Internat. Terminol. Code	0.50
IN ITALIAN: * G. BEVILACQUA: Corso di « Occidental » per gli italiani	1.20
* Dr Ing. DAL MARTELLO: Corso in 3 lezioni per corrispondenza	0.60
* FEDERN-RITTER: Vocabolario Occidental-Italiano	0.30
Dr Ing. Prof. A. PICCHI: Stato attuale del problema della L. I.	0.80
IN HISPAN: FEDERN-PEDRERO: Clave Occidental-Hispan (in preparation).	
CEBREIROS: Grammatica in hispan (in preparation).	
VARELA: Curs per correspondantie in 5 lecciones	0.50
IN NEDERLANDES: Grammatica (in preparation)	
IN PORTUGALES: * Curs de Occidental	0.30
IN RUMAN: ESCHENASY: Grammatica in ruman	0.60
IN RUSS: E. DE WAHL: Occidental por international relations (clave 8 p.)	0.20
IN SVED: Dr C.-E. SJOSTEDT: Occidental de internationella ordens språk	0.40
Dr B. BLOME: Lærobok i Occidental, 72 p.	1.80
Dr C.-E. SJOSTEDT: Dubbel Occidental-ordbok, 98 p.	1.80
C.-W. von SYDOW: Occidental eller Esperanto	0.50
K. SEGERSTAHL: Hjælpspræksfragen	0.40
IN TCHECOSLOVAC: O. MULTIS: Problem reci mezinârodní	0.50
J.-A. KAJŠ: Ucitel svetomluvy	0.50
J. PODOBSKY: Co je Occidental?	0.20
KAJŠ-PODOBSKY-SVEC: Slovník Česko-Occidentalský	1.50
J.-A. KAJŠ: Occidental, moderné rec mezinârodní	1.—
* SVEC-PODOBSKY-FEDERN: Slovník Occidentalsko-Cesky	0.60
PUBLICATIONES POR ESPERANTISTES: Occidental au Esperanto	0.30
Vocabularium Esperanto-Occidental e Occidental-Esperanto	0.30
Esperanto als Welthilfssprache	0.20

PUBLICATIONES IN OCCIDENTAL

	Afrancat
AMICIS: Manuel Menendez (Ovre 6)	SFr. 0.60
BALMONT K.: U es mi hem? (Ovre 2)	* 0.60
BERGER: Curs de Occidental in Occidental	* 0.50
Historie del Lingue international (Cosmoglotta Nr 116)	* 0.50
Vocabularium del centres de interesse	* 2.00
* CREUX: Stenografie Duployé por Occidental	* 1.00
* Rythmica in Occidental	* 0.60
* CREUX e BERGER: Li origines de Occidental	* 0.80
DIVERS AUTORES: Crestomatie de Occidental	* 1.50
* FEDERN Ilmari: Lexico Occidental-Occidental (in preparation)	* 6.50
De GUESNET: Manuale de conversation	* 0.40
GUILBERT-DEMINGER: Vocabularium Occ.-F.A.G. (por li tomes 1-6 de Ovre)	* 0.75
* Ing. HOERBIGER: Quo Occidental presenta al german ingeniero	* 0.50
* Ing. JANOTTA: Construction de un terminologic code	* 0.30
JANOTTA: Julius Lott, precursor de Occidental	* 1.20
* LITTLEWOOD: Vers un lingual instruction plu rational	* 0.50
MASARYK: Democratie e Humanità (Ovre 5)	* 0.45
PIGAL: Essentie de Occidental (Cosmoglotta Nr. 56)	* 0.50
PODOBSKY J.: Li astres del Verne (original poemas)	* 0.80
POE: Un descense in Maelstrom (Ovre 4)	* 0.60
R. ROLLAND: Europa e Asia, con vocabularium (Ovre 1)	* 0.60
TAKUR: Nationalism in Occidente	* 1.10
E. de WAHL: Radicarium directiv in 8 lingues	* 3.00
Spiritu de Occidental	* 3.00
Ancian collectiones de Cosmoglotta. Secun li annus	de fr. 4.— a 30.—
Ancian collectiones de Helvetia, per annu	* 2.00
Divers: SKOLD-PODOBSKY: Tri canzones. Du canzones (por un voce e piano) chascun	* 1.50
Prospecte in Occidental por adjunter in lettres, 5 ex. gratuit; chascun in plu	* 0.02
Verd carte de propaganda (duplic). Form. 10/25, chascun ex.	* 0.08
Covertes, postcartes con propaganda-textu, 100 ex.	* 1.50
Marcas glutinabil, 100 ex.	* 0.80
Insignie	* 1.50

Omni ti libres es recibibil de: Institute Occidental, CHAPELLE (Vd), Postchec-contos: Lausanne II.1969; Berlin 1683 36; Bruxelles 3504 45; Copenhag 269 72; Paris 1765 46; Stockolm 74 395.

COSMOGLOTTA

CONDITIONES DE ABONNAMENT.

Li precie de un simplic abbonament es li correspondent valore de Fr 4.— sviss o 13 respons-cupones. Ti quel misse Fr. 7.— sviss recive 3 exemplares (abonnament de propaganda). Li precie del abbonament in li moné del divers landes es indicat sur li ultim págine de chascun numero. — Li abbonament a Cosm. es annual, departe del 1-esim de chascun mensu e continua til li scrit revocation del abonator. On posse inviar li abbonament al sequent adresses:

- ANGLIA: H. D. Akerman, 84, Fernleigh Road, Winchmore Hill, LONDON N. 21.
 * Leonard Beer, 40 St. Rule St., LONDON S. W. 8
- BELGIA: Institute Occidental, CHAPELLE (Vd), Svissia (Pch. Bruxelles-Brussel 3504.45).
- CUBA: Bonneval e Fuentes, Arguelles 204, CIENFUEGOS.
- DANIA: Institute Occidental CHAPELLE (Vd), Svissia (pch. Kóbenhavn 269 72).
- ESTONIA: Kosmoglott, Eha 10, TALLINN.
- FRANCIA: L.-M. de Guesnet, 83, Rue Rochechouart, PARIS 9 (pch. Paris 26437).
 * Institute Occidental, CHAPELLE (Vaud), Svissia (Pch. Paris 1765 46).
- GERMANIA: Heribert Rosenlecher, PANA-Universal-Buchversand, WIESBADEN-BIEBRICH (Pch. Frankfurt a/M. 44977).
- HISPANIA: C. Varela, Maclá 5, FIGUERES (Cat.).
- ITALIA: Dr Ing. E. Dal Martello, San Silvestro-Casellario, 90, ROMA.
- NEDERLAND: H. Littlewood, v. Panhuysstr. 18 A., GRONINGEN.
- PORTUGAL: R. de Beça e Melo, Av. Sac. Cabral 56, PENAFIEL.
- RUMANIA: Aurel Eschenasy, Calea Brestei 27, CRAIOVA.
- TCHECOSLOVACIA: Jos Svec, Skroupova 2, PRAHA VII (Pch. Praha, Nr. 9.438).
- SVEDIA: Sved Occidental Federation, Box 171, STOCKHOLM (pch. Stockholm 70 315).
 * Institute Occidental, CHAPELLE (Vd), Svissia (pch. Stockholm 74395).
- SVISSIA e altri landes: Institute Occidental, CHAPELLE (Vd), (pch. II. 1969).
- U. S. A.: M. K. Gardner, 803 State Street, MADISON (Wis.)